

文学典

文學典第九十六卷

文學名家列傳八十四

明六 曾棨

按明外史本傳棨字子啟永豐人生而穎異貌魁偉博聞強記工文詞永樂二年殿試第一授翰林修撰尋詔解縉選進士二十八人進學文淵閣棨爲首編修周述周孟簡庶吉士王英王直章敝陳敬宗羅汝敬李時勉段民吾紳等皆與命司禮監月給筆墨紙光祿給朝暮饌禮部月給膏燭鈔人三錠工部擇近第宅居之帝嘗親試天馬海青歌棨援筆立就詞義兼美又嘗摘記載諸隱僻事問棨條對無遺悞由是見褻寵數侍燕閒應制賦詩賜賚重疊有薦文士者帝必問才學如棨否或命就棨辨論以觀其能修永樂大典爲副總裁書成遷侍讀內艱起復扈從邑人坐奸黨連棨家人多亡匿帝惜棨才竟原之家長安右門外失火延燒禁垣亦釋不問尋進侍讀學士修天下郡邑志復爲副總裁仁宗立除左春坊大學士仍兼侍讀學士宣宗立進少詹事預修三朝實錄再扈北巡三典會試爲文如源泉一瀉千里館閣中自解胡後諸大制作多出其手善筆札草書性樂易喜獎士

類飲酒至一石不醉天子知其好飲每出內醢賜之竟以飲得疾宣德七年卒於官年六十一贈禮部左侍郎諡襄敏 按懸笥瑣探曾狀元子啟名棨永豐人仕爲少詹事兼侍講學士善草書能詩歌稱江西才子有薦一士人至者旣入內將試上曰堂堂翰林獨無一人如彼者乎衆以曾棨應詔御試天馬歌棨之文先成文多溜亮士人後成詞復蹇澀上立賜棨瑪瑙帶始授士人官由是棨寵遇日至旣而有疾自惟不可起乃捉筆書曰宮詹不小歲周非天我以為多人以為少易簀蓋棺此外何求白雲青山樂哉斯丘卒贈禮部侍郎

陳繼

按明外史陳濟傳繼字嗣初吳人父汝言個儻有謀略嘗參張士誠軍事洪武初官濟南經歷坐法死繼生甫十月遺書數萬卷母吳躬織以資誦讀比長貫穿經學人呼爲陳五經奉母至孝有司上其事使御史廉之繼方隨母行灌母飲以壺獎拜而後飲帝聞嗟異府縣交薦以母老辭不就母卒哀毀過人永樂中舉孝行仍旌其母曰貞節仁宗卽位開弘文閣帝親臨幸問今山林亦有名士乎楊士奇曰聞東吳有陳繼者善爲文士奇初未識繼夏原吉治水蘇州得其文以歸士奇竟薦之召

爲國子博士尋改翰林五經博士直弘文閣備顧問宣宗初遷翰林檢討引疾歸卒 按吳中往

哲記檢討陳公嗣初爲人長者永樂中楊文貞公薦入翰林特被知遇每有顧問必在上左右老而居吳多聞故實德尊行成咸仰以爲宗工焉稱曰陳五經家有綠水園吳中稱衣冠之族爲第一

張肯

按蘇州府志肯字繼孟雲孫少承家學又從宋濂游詩文清麗有法尤長於南詞新聲宣德初與陳繼齊名繼以薦起而肯終布衣年八十餘卒所著有夢庵集

瞿佑

按列朝詩集佑字宗吉錢塘人楊廉夫游杭訪其叔祖士衡於傳桂堂宗吉年十四見廉夫香奩八題卽席倚和俊語疊出其花塵春跡云燕尾點波微有韻鳳頭踏月悄無聲黛眉顰色云恨從張敞毫邊起春向梁鴻案上生金錢卜歡云織錦軒窗聞笑語採蘋洲渚聽愁吁香頰啼痕云班班湘竹非因雨點點楊花不是春廉夫嘆賞謂士衡曰此君家千里駒也因以鞋盂命題宗吉製沁園春一闕廉夫大喜命侍妓歌以行酒歡飲而罷洪武中以薦歷仁和臨安宜陽訓導陞周府右長史永樂

間下詔獄謫戍保安十年洪熙乙巳英國公奏請赦還令主家塾三載放歸卒年八十七宗吉風情麗逸著剪燈新話及樂府歌詞多俚紅倚翠之語爲時傳誦其在保安當興河失守邊境蕭條永樂己亥降佛曲於塞下選子弟唱之時值元宵作望江南五首聞者淒然泣下又有漫興詩及書生嘆諸篇至今貧士失職者皆諷詠焉

李禎

按列朝詩集禎字昌祺廬陵人父伯葵號磐谷鈞叟有詩名昌祺弱冠文譽蔚起與曾子啟輩聲名相頡頏永樂癸未進士簡翰林院庶吉士與修永樂大典同事者推其該博僻書疑事互相諮決必以實歸授禮部主客郎中仁宗監國命權知部事藩憲員闕以才望特簡出爲廣西左布政父喪服除改河南丁內艱歸宣宗命輓喪乘傳赴官風疾增劇不待引年堅乞致仕生平剛嚴方直居官所至有風裁服食清約足跡不至公府富於才情多所結撰效瞿宗吉剪燈新話作餘話一編借以申寫其胸臆其歿也議祭於社鄉人以此短之乃罷白壁微瑕惟在閒情一賦其然豈其然乎安磐曰餘話記事可觀集句如不將脂粉澹顏色惟恨緇塵染素衣漢朝冠蓋皆陵墓魏國山河半夕陽對

偶天然可取也

林誌

按福建通志誌閩縣人永樂壬辰進士第二授翰林院編修秩滿陞修撰與修性理大全古今名臣奏議擢侍讀尋轉右春坊右諭德仍兼舊職給二俸寵之宣德初卒於官誌之生也其父夢梁僧寶誌入室因以爲名幼穎悟絕人從王偁游日能記數千言喜辨論偁因字之曰尙默其學無不研究舉於鄉及禮部皆第一後學多從質問經義門下如黃澤林碩輩皆所造就性恬於勢利早失父事母最孝宗族有貧而依異姓者悉歸而撫之與人交必誠必信每公退輒閉一室以詩文自娛所著有弗齋集

鄧林

按廣東通志林字士齊新會人洪武丙子鄉薦拔廣西貴縣教諭林素嗜學工古文辭嘗謂學詩於陶韋李杜學文於史漢韓柳學書於晉唐諸名家云考績至京大學士楊士奇祭酒李時勉見其詩文以爲嶺南人文在是留史館修書尋出教南昌被薦遷吏部主事宣德四年以事忤旨謫杭州名

士多從之吟詠自適也久之放歸田里卒林尤篤於友誼生平慷慨自命所著有退庵集傳於世

朱智

按饒州府志智字存禮鄱陽人博學多才工古文詩歌洪武間辟爲郡掾後薦授靖江王府紀善宣德六年以老致仕少傳楊東里贈以詩有卿才卓犖不可羈雄詞健筆皆如飛之句尤善真行得晉人書法別號夢草所著有煮雪稿卒年七十五

陳週

按福建通志週字仲昌閩縣人嗜學通魯史好爲詩時有所作吟咏自怡所居石潭上脩乎埃壙之外種竹萬挺結草亭栖隱其中以長子叔剛貴封監察御史楊士奇林誌重其人爲文贈之

陳璫

按福州通志璫由福州移家晉江不求聞達工詩詞宣德間累召不起號爲徵君

顧懋

按寧波府志懋字存誠少聰穎於書無所不讀以文自雄空視四海仁宗念司諫舊德詢其後尙書

蹇義以懟對詔起之挾裝上京師路出藩省進謁懟野服拜堂下省臣不與均禮懟起立不拜抗聲曰朝命起予非庶人役於官者公等不爲禮懟何敢僕僕自卑省臣訝其言意其中未必有也指所坐廳事曰堂名紫薇能記之否趣具楮墨令面爲之懟從容就席展紙濡毫頃刻立就文不更草書體數家俱備衆皆嘆曰奇才也以上客禮之陛見擢司經局正字聲譽日起然性素忼直不能隨時俯仰欲因事引退幼喪母鞠於祖母弟趙中和氏值中和沒陳情乞歸忌者劾以非禮謫戍南丹在戍發爲詩章幽憂覃思有柳柳州之情卒時年二十九有充然子集

馮芳

按浙江通志芳慈谿人通五經工書應試中式不赴公車歷宣宗朝始謁選時太后命寫楞嚴經與進士出身芳與焉上章自劾曰臣以佛經授美官是以異端進也如名教何昧死辭上笑曰腐儒可授之教職

梁夢

按江西通志夢字紹輝臨川人永樂四年郡舉應遺賢詔授都昌訓楊士奇薦夢預修太宗仁宗兩

朝實錄遺官徵之實錄成賜鞍馬白金乞歸省丘墓得請所著貞趣軒集二十卷子矩字式之由儒士任教諭年八十餘卒所著有寧靜軒集孫善字明善領鄉試力學有文行所著有復齋稿

鄭義

按廣東通志義其先家維揚元初有宣使留居潮遂爲潮陽人美丰儀性警敏嗜學貫通經史至六書星曆皆精研永樂辛卯鄉試第一壬辰署教北流宣德初丁母艱服除擢周府右長史上書諷諫周王及嗣王立復撰奉藩政要十五事以進並見採納在列十餘年多輔導功尋上書乞骸骨不報卒於官所著有右史集

蕭韶

按列朝詩集韶字鳳儀常熟人生宣德間有俊才嘗集藥名作桑寄生傳邑人至今傳之傳中閨情詩二首頗麗湖海耆英集載其他詩不能工也子奎字漢文中吳寬榜進士官終僉事吳有詩贈之

方熙

按福建通志熙字孟明莆田人宣德初進士御試三農望雲賦擢第一選翰林庶吉士爲衆所忌出

判潮州益肆力於文章後致仕有東軒集

黎公弁

按江西通志公弁字之冕宣德庚戌由經明行修薦任教諭累典文衡纂臨潁蒲圻二志所著有蠅鳴恐庵等集邵二泉寶亟稱之弟公穎字之秀與兄同薦歷仁和候官教諭累典文衡少保子謙薦陞監察御史所著問齋目錄數十卷

耿純

按山西通志純曲沃人宣德壬子應天鄉試授國子監學錄陞大名通判以詩經名世有詩對押韻行世子文聰文明俱舉人文審進士文明官同知文審官主事累陞參議

吳高

按廣東通志高字志高歸善人宣德八年進士歷官刑部主事員外郎福建參政好學能文托興林泉旣致政幅巾杖履徜徉山水惠陽風物陶寫殆盡嘗修校郡志文譽稱一時

吳訥

按蘇州府志訥字敏德常熟人七歲能誦五經父遵道爲沅陵主簿被繫至京訥乞自代事未白而父歿治喪如禮不用浮屠訥力學尙義兼善醫術永樂間以醫士舉至京懇辭館於襄城伯李隆家時黃河清李屬訥爲頌其首語引天地位萬物育爲言仁廟監國見之悅問隆曰汝武臣未解此孰所爲耶隆曰此臣客吳訥譔也仁廟書訥名於屏旣卽位拜監察御史出巡江浙立宋高宗所書九經論孟斷碑削秦檜所刊邪語表陸贄里修岳飛墓明年巡貴州有威惠旣行羣羅鬼計毛率其族追送至境外皆泣而去宣德五年陞右副都御史掌院事蒞憲務大體百僚推重焉正統己未乞骸骨特賜宴鈔遣之訥少以學自命濂洛關閩之書探討辨析各有指歸於性理則有羣書補註小學有集解晚歲道望尤尊接引學者動以古誼爲勉楊士奇謂訥心行皆古其人如金玉所著有北溪字義晦庵文鈔文章辨體文集卒年八十二賜葬祭諡文恪學者稱思庵先生孫淳正統戊辰進士擢御史以清謹聞

施槃

按江南通志槃字宗銘吳縣人幼警敏隨父游維揚主羅鐸家有都憲張某來鐸命其子與槃偕見

張令屬對曰新月如弓殘月如弓上弦弓下弦弓槩應聲曰朝霞似錦暮霞似錦東川錦西川錦張大奇之正統己未廷對第一授翰林修撰年甫二十詩文逼古人楊文定溥深重之

姜洪

按江西通志洪安樂人宣德癸酉進士選庶吉士預修宣宗實錄進職修撰洪爲詩文春容典雅自號松岡有文集十一卷及策府詳述行

周福

按江西通志福字慶鍾永豐人宣德正統間布衣也自幼警敏涉獵書史爲文操筆立就信守金公鉞會采英廟實錄辟福領其事兼預輯郡乘一時名重文苑

黎近

按江西通志近字之大臨川人宣德應文學材行科歷高要知縣時徭賊据城東南郡不能制近爲榜文諭降之被誣奏逮繫刑部作大明饒歌鼓吹曲十二章太平頌幸太學頌二章獻之英廟嘉嘆命釋之召見獻麒麟白象二頌上欲處之禁林爲忌者所沮改知祕陽復獻策萬餘言舉唐肅宗元

文宗爲戒上有疏遠小臣却肯直言之褻臨川歲役九江蘆柴夫多溺死不返近白當道免之所著未齋稿奉心集近百卷兄公輔字之及善屬文有醉墨窩集書巢言百餘卷

陳堪

按寧波府志堪字而學質任自然性耽經史宣德間膺薦授盱眙訓導遷攸縣教諭改鹽城秩滿擢銅鼓武學教授三任皆儒官自號三冷居士歸田教訓子姓隨資化導多所成就諸父敬宗最器重之簡抗不泛交與陸珪周垌日以詩篇廣和時稱詩壇三老

湯琮

按雲南通志琮金齒司人正統間與陶寧張志學曹遇結詩社素心相許隱居樂道以詩名

王曇

按雲南通志曇字夢雲山陰人博通經史尤工於詩正統間代父從軍雅尙儉素有古風教誨里閭子弟皆向學所著有芸窗吟稿

伍福

按江西通志福字天錫弟禮正統甲子鄉舉授咸寧諭用薦陞陝西按察副使提督學政福風格高邁言動有法詩文典雅家藏書數千卷手自校讎至老不倦嘗編咸寧縣志陝西通志數十卷修纂有法所著南山居士集雲峯清賞集藏於家

黎擴

按江西通志擴臨川人正統間由賢良舉歷任蘇州教授學士錢溥稱其文可造曾王門戶一時名勝皆重之自號雅齋所著學鳴稿子憲少騷文聲成化乙酉舉江西鄉試第一而卒

袁衷

按廣東通志衷字秉忠東莞人正統辛酉鄉貢初授戶部河南司主事歷梧州知府改平樂永州所至公正廉明民蒙其惠尤長於詩文所著有竹庭稿

吳恭

按福建通志恭字敬昭南平人爲翰林院庶吉士與修宣宗實錄以疾告歸後授餘干諭致仕卒有學古齋集

廖駒

按福建通志駒字致遠順昌人少失怙事母甚孝善吟咏後舉明經以養母辭母歿哀毀未幾憂憤發背卒有詩文行於世

林震

按福建通志震字敦聲長泰人家貧力學每樵耕必挾書自隨休臥樹下仰讀不輟宣德五年狀元及第正統間告歸以文章自娛非公事不入郡邑卒有星墜於庭

張益

按蘇州府志益字士謙吳縣人少長京師登永樂乙未進士選庶吉士授中書舍人轉大理評事與修宣廟實錄書成遷翰林修撰進侍讀學士入內閣典機務正統末死土木之難贈翰林學士諡文僖益爲人清淳謹厚文章圓熟對客數千言援筆立就楷書亦工初益與夏昶同年及見陳嗣初王孟端俱喜作文寫竹昶後見益作石渠閣賦出己上遂不復作文益見昶竹妙絕亦不復寫竹竟各以所能名世

龔錡

按福建通志錡建安人宣德進士第二人授翰林院編修正統間沙縣盜起錡爲大軍鄉導被害錡性孝友博學好吟咏善書有蒙齋集十卷子沅成化進士累官督稅兩浙

黃養正

按浙江通志養正名蒙以字行潮光子自幼岐嶷善楷書七歲隨父至京永樂中引見授中書舍人累官至太常少卿宮殿坊扁碑刻多其所書性尤端謹淹博工詩文宣宗甚愛之南還賜詩以別正統己巳之變先事陳諫弗從扈駕次土木也先衝逼行宮臣屬驚怖養正獨衛護弗避及駕北狩死之衣冠歸葬天順初追贈太常卿廕一子世襲錦衣百戶

何澄

按江陰縣志澄字彥澤永樂癸未舉於鄉同知蘄州遷刑部郎中折獄明允改文選持衡甚平因言事忤旨謫武當憂國不以去就遠近二其心封疏激切下詔獄洪熙改元放歸宣德間以薦擢袁州牧與民爲生歲歉不聞告匱郡學火災力議捐修赫然改觀嘗毀淫祠事載袁州志正統中乞休所

居植竹數百竿引以二鶴因號竹鶴老人工繪事家茶坡每月出梯牆望平楚蒼茫之景天欲雨扶杖登山眺羣峯大江煙雲鬱渟狀然後參以意匠飛灑縑緙神韻生動不減房山巨然壽躋九十九初居吏部以汲引人才爲事嚴大理本其所薦也

屈昉

按江南通志昉字季恆崑山人詩篇傳播爲楊文貞公所知楊問崑令羅永年季恆安在羅不能答楊曰若尙不識屈某耶羅心識之適詔舉經明行修之士以昉薦授南海縣丞所著有晚庵集

謝晉

按列朝詩集晉字孔昭吳縣人號葵丘工畫山水重疊爛熳尋丈之間不日而就嘗自戲爲謝疊山吳原博詩云風流前輩杳難攀謔語空傳謝疊山爲此也性耿介里人疾之以繪工起貢京師僑居金陵廿餘年以目眚放歸能詩有蘭亭集

荆詡

按山西通志詡猗氏人與兄志鸞生於涿郡受業薛文清門文清歎曰衍吾道者南縣兒也中正統